



27. juni 2013

Inatsisartut Suleriaasianni § 37 naapertorlugu Naalackersuisunut apeqquq imaattoq matumuuna saqqummiuppara:

**Naalackersuisunut apeqqutit:**

**1. Naalackersuisut isumaqarpat, ileqqorissaarnissaq pissuserissaarnissarlu eqqarsaatigalugit Ineqarnermut, Pinngortitamut Avatangiisinullu Naalackersuisup Miiti Lyngep aatsitassarsiorsinnaanermut akuersissummik, kisermaassilluni annikitsumik ingerlatsinissamut piffimmi aalajangersimasumi akuersissummik pineqartartumik peqarnera, akuersaarneqarsinnaanngilluinnartoq?**

**2. Naalackersuisut siulittaasuat suli isumaqarnerluni Naalackersuisunut ilaasortap taassumalu uiata aatsitassarsiorsinnaanermut akuersissummik peqarmata peqquserluttoqarlunilu kammalaatersortoqarsimasoq? Taamaangippat kissaatigaara isummamik allanngortitsisimanerup nassuiarneqarnissaa.**

**3. Ineqarnermut, Pinngortitamut Avatangiisinullu Naalackersuisumut Miiti Lyngemut qanoq kinguneqassava nammineq uiataluunniit aatsitassarsiornissamut akuersissut pigisartik tigummiinnarniarlugu aalajangissagaluarpata?**

(Inatsisartunut ilaasortaq Jens B. Frederiksen, Demokraatit)

**Tunngavilersuut:**

2010-mi immakanniunngitsumik pisoqarpoq. Taamani Aleqa Hammond illuatungiliuttunut siuttuuvoq taamanilu oqaasipiluissorpoq taamani Naalackersuisunut siulittaasup Kuupik Kleistip nulia kiisalu taamani Inuussutissarsiornermut Aatsitassarsiornermullu Naalackersuisup Ove Karl Berthelsenip nulia aatsitassarsiornissamut akuersissummik peqartut paasineqarmat.

Aleqa Hammond taamani oqarpoq (16. oktober 2010) Ritzaus Bureaumut



*”Aperivunga pineqartut nammineq tusagassiutinut oqarnerat naapertorlugu nungusarniagaannut kammalaatersornertut aamma peqquserlunnertut tamanna oqaatigineqarsinnaannginnersoq.*

AG -mut Aleqa Hammond ulloq 8.september 2010 oqarpoq:

*”Inuttut isumaqarpunga ileqqorissaarnek pissuserissaarnerlu eqqarsaatigalugit akuerineqarsinnaanngilluinnartoq.”*

Demokraatini pissanngatigaarput Aleqa Hammond suli taamatut isumaqarnersoq paasissallugu taamaassipallallu qanoq kinguneqartitsisoqassanersoq.

Tassunga atatillugu naatsorsuutigaarput qinigassanngortinnermut ataatsimiisitaliap Miiti Lynge attavigisimassagaat pinneraasiassanut annikitsunik aatsitassarsiornissamut akuersissut pigiinnarsinnaanngikkaa. Taamaalilluni Miiti Lyngep akuersissutini taanna ingerlaannaq utertinniarlugu nalunaarsimalluni. Takuneqarsinnaanngilarli uiata akuersissutini aamma utertinniarneraa.

Taamatulli oqareerlunga, qularutigineqassanngilaq, Demokraatini isumaqaratta, namminersortuuneg qanoq ikkaluartorluunniit aallarnisaasarnerlu tapersensoratsigit. Demokraatini ajornartorsiutiginnilarput Miiti Lynge aamma/imaluunniit uia aatsitassarsiornissamut akuersissummik peqarmat.

Apeqqutit akeqquneqarput tiguseraniit ullut sulliviit naliginnaasut qulit qaangiutsinnagit.